

JOÃO



LECTIO BA PREADOLEXENTE / ADOLEXENTE

INTRODUSAUN

Paskua mak festa boot liu ba sarani sira, tanba ita selebra Maromak nia domin ne'ebé soi ita liu husi mate. Hanesan fulan-fulan, ita hakarak hakbesik ema ida ne'ebé halo esperiênsia esepiál kona-ba Jezús, no iha tempu paskuál ita sei hakbesik s. João, ne'ebé sai sasin privilejadu kona-ba Jezús nia terus, mate no moris hi'as.

Molok hahú, ita sei husu **Espíritu Santu** nia tulun atu bele komprende s. João nia esperiênsia hodi bele repete iha ita-nia moris loron-loron nian. (bele hili knananuk ida ka orasaun ida)



Iha enkontru ida ne'e ita sei tuir "dalan" la hanesan bainbain, ita sei foti pasajen ida husi s. João nia surat dahuluk, iha ne'ebé "eskolante ne'ebé Jezús hadomi" (João hakerek nune'e kona-ba ninia an rasik iha evanjellu) halo "sintez" ida kona-ba ninia esperiênsia, hafoin hamutuk sei buka akontesimentu sira, husi ninia moris, ne'ebé halo ita komprende tansa nia hakerek nune'e. Tan ne'e, se bainbain bele lee resposta ba pergunta sira ne'ebé tuir fraze ida-idak evanjellu nian, iha enkontru ida ne'e ita sei buka hamutuk resposta iha akontesimentu evanjellu nian.

LECTIO

Iha Biblia ita bele lee Evanjellu haktuir S. João nian, surat tolu ne'ebé hakerek katak s. João nian, maski karik ninia eskolante sira mak hakerek, no Apokalipse. Tradisaun Kreda nian prezenta João nu'udar eskolante ne'ebé ki'ik liu iha eskolante sira leet, tan ne'e, ita bele sente katak nia moris besik uitoan adolexente sira-nian. Iha surat ida ne'e s. João dehan "ami", la'ós "ha'u", tanba ninia esperiênsia mak hanesan eskolante sira hotu nian... no mús ema fiar na'in nian; tan ne'e, nia hakarak fahe ho ema hotu atu hotu-hotu bele hetan ksolok.

Iha surat ida ne'e, s. João halo ita komprende katak fiar, la'ós buat ruma ne'ebé mai husi ita-nia matenek de'it, maibé envolve ita-nia isin no an rasik tomak.

Buat ne'ebé hori uluk kedas ami rona,

Ita hatene katak João mak halo parte eskolante uluk nian ne'ebé Jezús bolu atu tuir Nia, saida mak João rona durante ninia esperiênsia hamutuk ho Jezús?

Ita bele hanoin katak João rona buat hotu ne'ebé Jezús hato'o ba eskolante sira no mús ba ema lubun boot, maibé iha buat ruma ne'ebé Jezús hato'o ba nia de'it (Jo 19,25-27) ka ba eskolante ruma de'it (Mk 9,2-8)

[buat ne'ebé] ami haree ho ami-nia matan rasik

Buat ne'ebé João hakerek iha ninia evanjellu no surat sira la'ós buat ruma ne'ebé ema seluk haktuir ba nia, maibé buat ne'ebé nia rasik haree. Tuir imi-nia hanoin saida mak João haree ne'ebé halo nia deside atu saran nia moris tomak ba Jezús no ba Maromak nia Reinu?

Hanesan kona-ba "rona", bele hanoin katak João haree buat barak: maibé, dala ruma, Jezús lori nia, Pedro no Tiagu ketak hodi halo sira "haree" buat ne'ebé eskolante sira seluk seidauk bele komprende (Mk 5,37)



ami kontempla nia

Liafuan "kontempla" la hanesan ho liafuan "haree": tuir imi-nia hanoin diferênsia saida? Bele haktuir akontesimentu ida iha ne'ebé João kontempla?

Bainhira Jezús moris hi'as, laiha ema ida ne'ebé haree oinsá buat ne'e akontese, maibé João, ne'ebé haree oinsá Jezús mate, halai atu haree rate bainhira Madalena hato'o katak rate mamuk (Jo 20,3-8). Evanjellu dehan katak nia "haree no fiar"... loloos nia la haree "buat ida" (rate mamuk), maibé nia matan toman ona atu komprende akontesimentu Maromak nian. Liuliu iha Apokalipse, s. João hatudu ba sarani sira ninia kapasidade atu hateke ba istória no akontesimentu sira ho Maromak nia matan; maibé durante tempu ne'ebé nia tuir Jezús, nia iha oportunidade atu "kontempla" Jezús nia hahalok nu'udar Maromak ninian. Bele hanoin ba akontesimentu ruma ne'ebé eskolante sira hotu participá, ka momento ruma iha ne'ebé nia no eskolante balun de'it mak assiste.

no ami-nia liman kona nia

Tuir imi-nia hanoin, tansa João aumenta tan aspetu ida ne'e, "liman ne'ebé kona Jezús"?

Iha esperiênsia domin no amizade nian, dala barak ema sira la'ós de'it ko'alia ka hateke ba malu, maibé kaer liman, "uza" isin atu halo maluk sira "sente" sira nia hakaran atu fahe sira-nia moris. João mós koko esperiênsia ida ne'e ho Jezús (Jo 13,23-25)

... kona-ba liafuan moris nian, moris ne'e mosu duni, no ami haree nia hodi fó sasin no haklaken ba imi moris rohan laek ne'ebé horik ho Aman no hatudu an mai ami

Fraze ida ne'e naruk duni, bele koko atu halo simplés hodi espresa ho liafuan 5 ka 6 se mak Jezús?

Esperiênsia ne'ebé João halo iha momento Paskua nian, kona keda ninia moris, tan ne'e nia bele temi "liafuan moris nian", maibé la'ós moris nar-naran de'it, João ko'alia kona-ba moris ne'ebé iha kualidade no valór boot iha Maromak niaoin: moris rohan la'ek, sei ita hatene moris iha "komuñiaun" ho Maromak no ho maluk sira.

Buat ne'ebé ami haree no ami rona, ami haklaken mós ba imi, atu imi bele hela ho ami iha domin ne'ebé ami iha ho Aman no ho nia Oan Jezús Kristu.

João repete buat ne'ebé dehan tiha ona kona-ba ninia esperiênsia, maibé katak sa "hela iha domin ne'ebé ami iha ho Aman no iha nia Oan Jezús Kristu"?

Iha ninia Evanjellu, João ko'alia kona-ba ninia an rasik nu'udar "eskolante ne'ebé Jezús hadomi" (Jo 13, 23; 19, 26; 20, 2.4-8; 21, 7. 20.32) dehan katak nia deskobre valór domin nian iha ninia moris, hodi sai konxiente katak Maromak hadomi nia molok nia hatene. Iha ninia surat sira s. João oinsá Maromak nia domin hakonu ita-nia moris no konvida ita atu hadomi ema seluk (1Jo 4,16.18; 2Jo 1,6).

Ami hakerek buat hirak ne'e atu ami nia ksolok bele sai loloos.

Oinsá buat ne'ebé João hakerek bele halo ksolok sai loloos?

La bele fiar se la hadomi, no domin lori ema ba ksolok: iha ninia moris hamutuk ho Jezús, João halo esperiênsia kona-ba ksolok boot, no nia hatene katak ksolok mak loos, bainhira ita bele fahe ho ema seluk, atu ema ne'e mós bele halo esperiênsia hanesan.

MEDITATIO

Ita koko atu haree fila fali

testu ida ne'e, hodi husu

ba ha'u-nia an rasik

oinsá ha'u bele banati

tuir João nia esperiênsia

iha familia, iha fatin iha

ne'ebé hela ba, iha

sosiedade no Kreda.

- Karik husi ki'ik keda ha'u tuir parokia no oratóriu nia atividade sira; ha'u koko atu hanoín: sa de'it ha'u rona, haree, kontempla, kona ne'ebé haboot ha'u-nia fiar ba Jezús no Maromak. Ha'u komesa husi ki'ik to'o agora.
- Buat hirak ne'e ne'ebé ha'u foin hetan, oinsá halo ha'u komprende Maromak nia planu no tuir Jezús ho laran manas?
- Hodi fiar ba Jezús ha'u haksolok? Tansá?
- Oinsá, tuir ó-nia tinan, ó haklaken Jezús ba maluk sira no fó sasin kona-ba ksolok ne'ebé ó hetan?

Reflete kona-ba resposta ba pergunta sira ne'e, atu bele dehan, hamutuk ho João katak fiar ba Jezús hodi lori ksolok no hatudu ksolok ne'e sai loos liután (ka, tuir tradusaun seluk, halo ema nakonu ho ksolok)

ORASAUN

Ksolok mak presente Maromak no presiza harohan ba Nia atu bele hetan iha ita-nia moris. S. Paulo iha surat ba sarani sira ne'ebé hela iha Filipe konvida sira atu haksolok iha Na'i (Fil 4,4-7); ida ne'e mak II Leitura iha Missa don Bosco nian. Saida mak fó ksolok ba ó? bele koko atu hakerek orasaun ida iha ne'ebé agradece Maromak ba ksolok ne'ebé nia haraik iha ninia moris?

ATIVIDADE

Ema dehan katak ksolok mak sentimentu ne'ebé sai boot no kle'an liután bainhira ita fahe ba ema seluk. Karik, nu'udar grupu bele sai "misionariu" hodi ba haklaken imi-nia esperiênsia fiar no ksolok nian ba maluk sira ka ema sira ne'ebé "malirin" atu tuir Maromak.

